

【重映《柔道龍虎榜》】「古天樂電影院」今揭幕 播港人期待電影

13,810

建立時間 (HKT): 0719 19:51



攝影：沈健程

「古天樂電影院louis Koo cinema」命名儀式今晚喺灣仔藝術中心舉行，電影院前身為agnès b.電影院，但贊助期完結後，由古天樂投資電影公司天下一同藝術中心合作，舉辦香港好電影放映活動，為期三年，戲院可以容納119人，票價75元，會播放由新晉導演拍攝電影、香港人期待電影、甚至重播受歡迎電影等，首個項目就係電影《逆流大叔》，接住有舊片《柔道龍虎榜》及新片《翠絲》。

古仔中午出席另一活動時已經預告，晚上要開工缺席命名儀式，雖然人唔在但心在，現場播出古仔預先拍攝支持短片，希望呢次合作可以推動香港電影業及幫助新晉導演。

余香凝同胡子彤就代表《逆流大叔》嚟支持活動，余香凝同陳家樂甩拖後終於公開露面，見佢心情唔錯，佢話：「一直有保持工作，之前去咗馬來西亞拍鬼片，再去台北同紐約電影節，又宣傳《逆流大叔》，一路都工作pick up心情。」佢話喺工作期間順便散心：「馬來西亞嘅劇組都好好，我好鍾意食榴槿，去到台灣、紐約都好多美食，有諗住去紐約學戲，不過好貴，到時可能要帶杯麵，現時計畫中，完成手頭上工作希望半年以內可以實行。」余香凝否認要離開傷心地：「一路都想學多啲嘢，又想學潛水，但嚇親我媽咪，我嘢日終於正式報名，媽咪好擔心，仲同我講唔好做傻事，係咪諗唔開。」

舊愛陳家樂今日出席活動被問到想唔想復合，陳家樂話唔講感情事，余香凝亦口徑一致：「唔講喇，我哋有聯絡，互相關心，簡單問候幾句。」早前陳家樂上載有余香凝照片背景相，留言「分手一個月了，我還是不敢清理我們的遺物，你的所有東西仍在，不是我懶，而是不捨得，我不像你。」余香凝話：「呢啲唔講，問番佢本人啦。」（新聞連結：<https://bit.ly/2JGYhe0>）

胡子彤就好開心可以於古仔第一個電影院進行首映，期待電影上映，所有優先場都唔會睇，留返首映時先同大家分享喜悅，會隨隊去謝票。係咪預埋女友歐鎧淳一齊睇首映，佢就話：「唔知有幾多飛，屋企人先，仲有朋友同隊友，女朋友當然唔少得。」聽落女友係排第四？佢即刻兜返：「呢啲好死，我希望少啲飛俾我攞到，代表反應好，到時我買飛畀女友同uncle auntie睇都得。」🍀



古仔中午出席另一活動，預告要開工出席唔到今晚呢個命名儀式。（攝影：陳俊強）



遲啲會唔會同啲中學一樣，四圍都有「古天樂電影院」？



《逆流大叔》係古天樂電影院，女主角余香凝出席宣傳，表示可以到外國讀戲。



胡子彤首映冇預女友歐鎧淳，但到時會買飛請女友同佢屋企人睇。